



## O'ZBEKISTON RESPUBLIKASINING MUSTAQILLIGINING E'LOH QILINISHI VA UNING TARIXIY AHAMIYATI. MUSTAQILLIK YO'LIDA XIZMAT QILGAN BUYUK SHAXSLAR

**Keldiyeva Shaxnoza**

*Andijon davlat pedagogika insituti O'zbekistonning eng yangi tarixi o'qituvchisi*

**Abdusattorov Abdulaziz**

*Andijon Davlat pedagogika institutining Matematika va informatika yo'nalishi 1-bosqich talabasi*

**Ismoilov Islombek**

*Andijon Davlat pedagogika institutining Matematika va informatika yo'nalishi 1-bosqich talabasi*

**Obidjonov Muhammadqobul**

*Andijon Davlat pedagogika institutining Matematika va informatika yo'nalishi 1-bosqich talabasi*

**Annotatsiya:** O'zbekiston – mustaqil davlat. O'zbekiston Respublikasi Oliy Kengashi 1991 - yil 26 - avgust kuni O'zbekistonning davlat mustaqilligi to'g'risida qonun loyihasini tayyorlash hamda 31 - avgustda Oliy Kengash sessiyasini chaqirishga qaror qildi. O'zbekiston Kompartiyasi Markaziy Qo'mitasi va Markaziy nazorat qo'mitasining 28 - avgustda bo'lgan qo'shma Plenumi Respublika Kompartiyasining KPSS MQ bilan har qanday aloqasini to'xtatishga, KPSSning barcha tashkilotlaridan chiqishga, uning Markaziy organlaridagi o'z vakillarini chaqirib olishga qaror qildi. Ana shunday vaziyatda O'zbekiston Oliy Kengashining XII chaqiriq navbatdan tashqari VI sessiyasi 1991 - yil 31 - avgustda o'z ishini boshladi.

**Kalit so'zlar:** Mutaqillik, suverenitet, referendum, prezident, qonun, o'zbekiston respublikasi prezidenti, Oliy Kengash, konsitutsiya.

O'zbekistonning mustaqil davlat deb e'lon qilinishida mazkur sessiya katta tarixiy ahamiyat kasb etishini alohida ta'kidlash lozim. Unda "O'zbekiston Respublikasining Davlat mustaqilligi to'g'risida" hamda "O'zbekiston Respublikasining Davlat bayrog'i to'g'risida"gi masalalar kun tartibiga qo'yilib, qizg'in muhokama qilindi. Sessiyada O'zbekiston Prezidenti I.A.Karimov nutq so'zlab, sobiq Ittifoqda so'nggi paytlarda yuz bergan ijtimoiy - siyosiy voqealarni, davlat to'ntarishiga urinish oqibatlarini tahlil qilib, ular O'zbekiston taqdiriga, xalqimiz tarixiga bevosita daxldor ekanligini har tomonlama asoslab berdi. Vaziyatdan kelib chiqqan holda, O'zbekiston Respublikasining davlat mustaqilligini e'lon qildi va uni mustaqillik to'g'risidagi qonun bilan mustahkamlashni taklif qildi. Oliy Kengash deputatlari tomonidan moddama - modda muhokamadan so'ng "O'zbekiston Respublikasining Davlat mustaqilligi asoslari to'g'risida"gi 336 – XII - sonli Qonun qabul qilindi. So'ngra "O'zbekiston



Respublikasining Davlat mustaqilligi to'g'risidagi Oliy Kengash Bayonoti" qabul qilindi. Bayonotda bunday deyilgan edi: "Mustaqillik Deklaratsiyasini amalga oshira borib, O'zbekiston Sovet Sotsialistik Respublikasi Oliy Kengashi O'zbekistonning Davlat mustaqilligini va ozod suveren davlat - O'zbekiston Respublikasi tashkil etilganligini tantanali ravishda e'lon qiladi". Oliy Kengash sessiyasi "O'zbekiston Respublikasining davlat mustaqilligini e'lon qilish to'g'risida"gi 335 – XII - sonli qaror qabul qilindi. Mazkur qarorda: Respublikaning davlat mustaqilligi to'g'risidagi Oliy Kengash bayonoti tasdiqlansin va respublika bundan buyon O'zbekiston Respublikasi deb atalsin; 1-sentabr O'zbekiston Respublikasining Mustaqillik kuni deb belgilansin va 1991 - yildan boshlab bu kun bayram va dam olish kuni deb e'lon qilinsin, deb qat'iy belgilab qo'yildi. "O'zbekiston Respublikasining davlat mustaqilligi asoslari to'g'risida"gi qonun g'oyat katta ahamiyatga ega bo'lib, bu qonun asosida O'zbekistonning huquqiy holati tubdan o'zgardi. O'z mohiyatiga ko'ra bu hujjat respublika uchun vaqtincha konstitutsiya rolini ham o'ynaydigan bo'ldi. 17 moddadan iborat ushbu qonun suveren O'zbekiston Respublikasining asosiy belgilarini aniqlab berdi. Qonunning birinchi moddasida: "O'zbekiston Respublikasi o'z tarkibidagi Qoraqalpog'iston Respublikasi bilan birga, mustaqil, demokratik davlatdir", – deb qonunlashtirib qo'yildi. Qonunda O'zbekiston Respublikasining xalqi suverendir va respublikada davlat hokimiyatining birdan - bir sohibidir. U o'z hokimiyatini ham bevosita, ham vakillik idoralari tizimi orqali amalga oshiradi, deb belgilab qo'yildi. Mustaqillik asoslari to'g'risidagi qonunda O'zbekiston Respublikasi to'la davlat hokimiyatiga ega, o'zining milliy davlat va ma'muriy - hududiy tuzilishini, hokimiyat va boshqaruv idoralari tizimini mustaqil belgilaydi, davlat chegarasi, hududi daxlsiz va bo'linmas bo'lib, uning xalqi o'z xohish - irodasini erkin bildirmasdan turib o'zgartirilishi mumkin emas, deb qat'iy qonunlashtirib qo'yildi. Mazkur qonunda respublika hududidagi yer, yer osti boyliklari, suv va o'rmonlar, o'simlik va hayvonot dunyosi, tabiiy va boshqa resurslar, respublikaning ma'naviy boyliklari O'zbekiston Respublikasining milliy boyligi, mulki hisoblanadi, deb belgilab berildi. O'zbekiston Respublikasi o'z hududida oltin, boshqa qimmatbaho metallar va toshlarni qazib chiqarish, qayta ishlash va saqlashni mustaqil amalga oshiradi hamda nazorat qiladi, o'z oltin zaxirasini yaratadi, — deyiladi bu qonunda. 1991 - yil 30 - sentabr kuni O'zbekiston Respublikasi Oliy Kengashining navbatdan tashqari VII sessiyasida "O'zbekiston Respublikasining Davlat mustaqilligi asoslari to'g'risida"gi O'zbekiston Respublikasining Qonuniga konstitutsiyaviy maqom berish haqida"gi 358 – XII - sonli Qonuni qabul qilindi. Jumladan, unda shunday deyiladi: "O'zbekiston Respublikasining Davlat mustaqilligi asoslari to'g'risida" 1991- yil 31 - avgustda qabul qilingan O'zbekiston Respublikasining Qonuniga konstitutsiyaviy maqom berilsin. O'zbekiston Respublikasining amaldagi Konstitutsiyasi moddalariga "O'zbekiston Respublikasining Davlat mustaqilligi asoslari to'g'risida"gi Qonunning moddalariga zid kelgan hollarda mazkur



Qonunga amal qilinsin», – deb belgilab qo'yildi. Shu tariqa, xalqimizning asriy orzusi, umidlari ushaldi, ro'yobga chiqdi. Uzoq yillar davom etgan kurash natijasida mamlakatimiz, xalqimiz siyosiy qaramlik asoratidan qutildi. Dunyo xaritasida yana bitta mustaqil davlat — O'zbekiston Respublikasi paydo bo'ldi. O'zbekiston tarixida yangi davr milliy istiqlol davri boshlandi. O'zbekiston uchun mustaqil ichki va tashqi siyosat yuritish, xalqimiz uchun o'z taqdirini o'zi belgilash, o'zlari uchun munosib turmush yaratish imkoniyati vujudga keldi. Umumxalq referendumini. O'zbekiston erishgan istiqlolni mustahkamlash uchun, avvalo, xalqning fikrini bilish, mustaqillikka munosabatini aniqlash zarur edi. Shu maqsadda 1991 - yilning 18 - noyabrida O'zbekiston Respublikasi Oliy Kengashining VIII sessiyasi "O'zbekiston Respublikasi referendumini o'tkazish to'g'risida" qaror qabul qildi. Qarorda quyidagilar belgilandi: 1991 - yil 29 - dekabr, yakshanba kuni O'zbekiston Respublikasining Davlat mustaqilligi to'g'risidagi masala bo'yicha O'zbekiston Respublikasining referendumini o'tkazilsin. Referendumda ovoz berish byulleteniga masala quyidagi ta'rifda kiritilsin: "O'zbekiston Respublikasi Oliy Kengashi tomonidan e'lon qilingan O'zbekiston Respublikasining davlat mustaqilligini ma'qullaysizmi?". Referendumga katta tayyorgarlik ko'rildi. Referendumni uyushqoqlik bilan o'tkazish maqsadida Markaziy saylov komissiyasi, 13 okrug, 7 ming uchastka saylov komissiyalari tuzildi. 1991 - yil 29 - dekabr kuni bo'lib o'tgan referendumda 9 million 898 ming 707 kishi yoki saylov ro'yxatiga kiritilganlarning 94,1 % qatnashdi. Ularning 98,2 % referendumda qo'yilgan savolni ma'qullab ovoz berdi. Demak, O'zbekistonning Davlat mustaqilligi umumxalq tomonidan yakdillik bilan ma'qullandi. Shuni ta'kidlash lozimki, referendum butun respublika hududida qonun asosida tashkiliy jihatdan uyushqoqlik, fuqarolarning yuksak siyosiy faolligi bilan o'tdi. Buni referendumda AQSH, Turkiya, Malayziya va boshqa mamlakatlardan kelgan mustaqil kuzatuvchilar ham tasdiqladilar. Ushbu mavzu mamlakatimizda mustaqillikning qo'lga kiritilishi va uni mustahkamlash yo'lida amalga oshirilgan ishlar, ularning samaralariga Bag'ishlangan bo'lib, unda ma'ruzachi avvalo birinchi masala yechimiga kirishar ekan, mustaqillik arafasida respublikadagi ijtimoiy-iqtisodiy va siyosiy jarayonlarda yuzaga kelgan vaziyatni tahlil etadi. Buni quyidagicha o'rganish tavsiya etiladi. O'zbekiston o'zining davlat mustaqilligini e'lon qilgan vaqtda mamlakatdagi ijtimoiy-iqtisodiy ahvol o'ta murakkab bo'lib, quyidagilar uning o'ziga xos xususiyatlari sifatida namoyon bo'lar edi: aholining turmush darajasi bo'yicha O'zbekiston sobiq ittifoq tarkibida oxirgi o'rinlardan birida turar edi; aholining 60% dan ko'proq qismi yashaydigan qishloq joylarida industrial rivojlanishning ahamiyatli darajada ortda qolishi sharoitida iqtisodiyotda yirik sanoat shaharlaridagi gigant korxonamonopolistlarning haddan tashqari konsentratsiyasi va ixtisoslashuvi hukm surardi; iqtisodiyotda ma'muriy tarzdagi narxni tashkil etish va resurslarni taqsimlash bilan bog'liq kuchli nomutanosibliklar kuzatilar edi; mamlakat o'zbek davlatchiligining asoslarini yaratish zarurati oldida turardi; og'ir ekologik ahvol



mavjud edi. Ko'plab tarmoqlarda ittifoq davrida shakllangan xomashyoni qazib olish va dastlabki qayta ishlash, yarim fabrikatlarni tayyorlash bosqichida uzilib qoluvchi tugallanmagan texnologik siklga ega ishlab chiqarishlar ustunlik qilar edi. Respublikaning asosiy tarmoqlari kompleks tarzda emas, balki Rossiya hamda boshqa respublikalardagi ishlab chiqarish tarmoqlariga resurslar va tayyor mahsulotlarni ko'p minglab kilometrlarga (ko'pincha noratsional, qarama-qarshi tarzda) yetkazib berish orqali "bog'lab qo'yish" maqsadida rivojlantirilgan edi. 70 yildan ko'proq vaqt hukm surgan ma'muriy-buyruqbozlik tizimiga asoslangan sobiq ittifoqdagi noto'g'ri, samarasiz ijtimoiy-iqtisodiy siyosat 80-yillarning oxiriga kelib barcha ittifoqdosh respublikalar qatorida O'zbekiston aholisining ham yashash sharoitlarini og'irlashtirib, uni ko'plab muammolar iskanjasiga solib qo'ygan edi. Jumladan, quyidagilarda bu o'z aksini topayotganini kuzatish mumkin edi:

1) Respublikada demografik vaziyatning murakkabligi. O'zbekistonda aholining o'sish sur'atlari ittifoq sur'atlariga qaraganda uch barobardan ziyod yuqori bo'lganiga qaramay, uzoq yillar davomida sanoat va iqtisodiyotning boshqa tarmoqlarida ish joylarini ko'paytirish hamda aholining hayot ta'minoti uchun zarur shart-sharoitlarni yaratish bilan mustahkamlab borilmadi. Bu esa odamlar turmush sharoitining yomonlashuvi, ishsizlar sonining ko'payishi, ijtimoiy mehnat unumdorligi va aholi daromadlarining kamayishi, pirovard natijada xalq farovonligining pasayishiga olib keldi;

2) Respublika iqtisodiyotining biryuqlama, haddan tashqari nomaqbul ixtisoslashtirilishi natijasida qishloq xo'jaligi bilan bir qatorda, sanoatda ham, asosan, xomashyoni birlamchi qayta ishlash tarmoqlari ustunlik qilib, tayyor mahsulot, avvalo xalq iste'moli mollari ishlab chiqaruvchi tarmoqlarning ulushi juda past edi;

3) ishlab chiqaruvchi kuchlar va avvalo, sanoat obyektlari asosan stixiyali ravishda, aniqrog'i, har xil o'zboshimchalik, buyruqbozlik bilan qabul qilingan qarorlar asosida, ko'pincha ilm-fan vakillari, bilimli va obro'li mutaxassislarining tavsiyalari mutlaqo e'tiborga olinmay joylashtirildi;

4) Respublikadagi ijtimoiy ahvol, odamlarning ijtimoiy ta'minoti va ularni ijtimoiy himoya qilishning mutlaqo qoniqarsizligi. Ayniqsa, qishloq aholisining kanalizatsiya va vodoprovod bilan ta'minlanishi atigi 5 foizni, ichimlik suv bilan ta'minlanishi salkam 50 foizni, tabiiy gaz bilan ta'minlanishi 17 foizni tashkil etar edi. Aholini uy-joy, sog'liqni saqlash, madaniy-maishiy xizmat obyektlari, maktablar, bolalar bog'chalari va h.k.z. bilan ta'minlash ishlarida siljishlar sezilmadi. Vaholanki, aholining ko'pchilik qismi qishloq joylarida istiqomat qilar edi.

***ISLOM KARIMOV haqida ISLOM KARIMOV O'zbekiston qahramoni va mustaqilligimizning asoschisi:*** O'zbekiston respublikasining birinchi prezidenti va qahramoni Islom Abdug'aniyevich Karimov 1938-yil 30 yanvarda Samarqand shahrida tavallud topgan. O'zbekiston Respublikasining Birinchi



Prezidenti, o'z umrini elu yurt ravnaqiga bag'ishlagan Islom Karimov vafot etganiga sal kam 8 yil boldi. Mustaqil O'zbekiston davlatining asoschisi, buyuk davlat va siyosat arbobi, o'zbek xalqining ulug' va ardoqli farzandi, mamlakatimizning Birinchi Prezidenti Islom Abdug'aniyevich Karimov Vatanimizni mustabid tuzum qaramligidan ozod qilib, halokat yoqasiga kelib qolgan yurtimizni qayta tikladi. Buyuk Yo'l boshchimiz g'oyat qaltis va tahlikali bir vaziyatda og'ir qiyinchiliklar va sinovlarga qaramay, tarixan qisqa davrda O'zbekistonni jadal va barqaror sur'atlar bilan rivojlanayotgan zamonaviy demokratik davlatga aylantirdi. Islom Abdug'aniyevich Karimov o'zining serqirra siyosiy faoliyati, oliyjanob insoniy fazilatlarini bilan Vatanimizning ko'p asrluk tarixida o'chmas iz qoldirdi. U nafaqat O'zbekiston, balki jahon miqyosida katta hurmat va obro'-e'tiborga sazovor bo'lgan ulkan shaxs va arbob sifatida tanildi. Ijtimoiy fikr» jamoatchilik fikrini o'rganish markazi tomonidan O'zbekistonning Birinchi Prezidenti xotirasi kuni arafasida o'tkazilgan so'rov bu insonning mustaqil davlatimiz rivojida tutgan o'rni haqida ham yurtlarimizning fikrlarini aniqlash imkonini berdi. Unda mamlakatimiz hududlarida yashovchi turli millatga mansub aholi barcha qatlami vakillaridan iborat 1100 kishi ishtirok etdi. Buyuk bobomiz haqida qancha gapirsak ham kam chunki unday inson kamdam kam bunaqa vatanini sevadigan inson kam deb oylayman. Biz hammamiz shu bobomizdan o'rnak olishimiz va shunday vatanimizni sevishimiz zarur.

Birinchi Prezidentimiz mustaqil davlatimiz asoschisi, buyuk davlat va siyosat arbobi, o'zbek xalqining fidoyi, sadoqatli farzandi sifatida xotiramizda mangu yashaydi.

O'zbekistonning mustaqillikdan keyingi ishlari va jannatmakon o'zbekistonning paydo bolishi.

Jahon tajribasi shuni ko'rsatadiki, dunyodagi hamma mamlakatlar uchun maqbul bo'lgan bir xil taraqqiyot yo'li, bir xil andoza bo'lishi mumkin emas. Hozirda bozor iqtisodiyotiga o'tishning turli modellari mavjud bo'lib, ular barcha mamlakatlarni bitta manzilga – erkin bozor iqtisodiyoti tizimiga olib keladi. Ammo, bozor munosabatlari shakllanishining sotsial – iqtisodiy, tarixiy, milliy va xalqaro sharoiti har xil bo'lganligi tufayli, unga o'tishning milliy xususiyatlari ham mavjud bo'ladi. Shu nuqtai nazardan biror mamlakatning taraqqiyot yo'lini yoki taraqqiyot modelini borligicha qabul qilib bo'lmaydi. Natijada o'ziga xos yo'lni tanlash muhim hisoblanadi. O'zbekiston mustaqillikka erishganidan so'ng kun tartibida jahon andozalariga mos keladigan davlat qurish, siyosiy, ijtimoiy va iqtisodiy sohada tub islohotlarni amalga oshirish, ularni qonun bilan mustahkamlaydigan huquqiy tizimni yaratish vazifasi turardi. Chunki sobiq sovet Ittifoqi tuzumga xos ijtimoiy munosabatlar va jarayonlar, jumladan, unda amal qilgan va markazlashgan ma'muriy boshqarish tizimiga asoslangan iqtisodiyot endilikda barpo qilinajak yangi jamiyat manfaatlariga mos kelmas edi. Mulkchilik, mulkka egalik va uni boshqarish, ishlab chiqarish omillari, bozor



mexanizmi, davlatning ijtimoiy - iqtisodiy hayotini barqaror izga solishga qaratilgan ob'ektiv zaruriyat yuzaga keldi. Natijada mustaqillik yillarida mamlakat taraqqiyot uchun O'zbekistonda bozor munosabatlariga o'tishning o'ziga xos yo'lini ishlab chiqish va bu yo'lda tub islohotlarni belgilash zarurati yuzaga keldi. Mamlakatimiz taraqqiyot yo'lini ishlab chiqishiga O'zbekiston Respublikasining birinchi Prezidenti I.A.Karimov boshchilik qildi. Islom Karimov o'n ikkinchi chaqiriq O'zbekiston Respublikasi Oliy Kengashining navbatdan tashqari 1992 - yil 4 - yanvardagi IX sessiyasida so'zlagan dasturiy nutqida hamda 1992 - yil avgust oyida nashr etilgan "O'zbekistonning o'z istiqlol va taraqqiyot yo'li" asarida O'zbekistonning taraqqiyot yo'lini har tomonlama puxta belgilab berdi. Mazkur asarda yangilangan jamiyatda yashovchi kishining siyosiy, iqtisodiy va ijtimoiy turmush tarzini kafolatlovchi yo'llar ko'rsatib berildi. Jumladan, siyosiy sohada bu: xalq ham bevosita, ham o'z vakillari orqali davlat hokimiyatini amalga oshirishda to'liq ishtirok etishi lozimligini; hokimiyat bo'linishining jahon tan olgan qonun chiqaruvchi, ijro etuvchi va sud hokimiyatiga bo'linish tamoyilini joriy etish asosida demokratiyani chuqurlashtirish hamda milliy davlatchilikni barpo qilishni; jamiyatning siyosiy tizimini, davlat idoralarining tuzilmasini tubdan yangilashni; barcha fuqarolarning qonun oldidagi huquqiy tengligini va qonunning ustunligini ta'minlashni; bir mafkuraning, bir dunyoqarashning yakka hokimligidan voz kechish, siyosiy tashkilotlar, mafkuralar va fikrlar xilma - xilligini tan olishni; demokratiyaning qonuniy tarkibi sifatida ko'ppartiyaviylikni shakllantirishni; O'zbekistonda tug'ilib, uning zaminida yashayotgan, mehnat qilayotgan har bir kishi, milliy mansubligi va e'tiqodidan qat'i nazar respublikaning teng huquqli fuqarosi bo'lishga erishishni bildiradi. Iqtisodiy sohada esa bu: milliy boylikning ko'payishini ta'minlaydigan barqaror, rivojlanib boruvchi iqtisodiyotni barpo etishni; ijtimoiy jihatdan yo'naltirilgan bozor iqtisodiyotini bosqichma- bosqich shakllantirishni; mulk egalari huquqlarining davlat yo'li bilan himoya qilinishini ta'minlash va barcha mulkchilik shakllarining huquqiy tengligini qaror toptirishni; iqtisodiyotni o'ta markazlashtirmasdan korxonalar va tashkilotlarning mustaqilligini kengaytirishni, davlatning xo'jalik faoliyatiga bevosita aralashuvidan voz kechishni bildiradi. Ijtimoiy va ma'naviy sohada bu: insonparvarlik g'oyalariga sodiqlikni, inson, uning hayoti va shaxsiy daxlsizligi, erkinligi, qadr - qimmatini, yashash joyini tanlash huquqi saqlanib qolishini; ma'naviyatni qayta tiklashni; o'zbek tilini rivojlantirishni; hurfiylik, vijdon va din erkinligini qaror toptirishni; ijtimoiy adolat qoidalarini ro'yobga chiqarish, aholining eng nochor qatlamlari - keksalar, nogironlar, yetim - yesirlar, ko'p bolali oilalar, o'quvchi yoshlarning davlat tomonidan iqtisodiy muhofazaga bo'lgan kafolatli huquqlarini ta'minlashni; odamlarning iste'dod qobiliyatlarini namoyon etish uchun shart - sharoit yaratish, ma'naviy mulkni himoya qilishni bildiradi, deb ta'kidlandi. O'zbekistonning o'ziga xos taraqqiyot yo'li Islom Karimovning keyingi asarlari, ma'ruza va nutqlarida yangi ma'no - mazmun bilan to'ldirilib,



aniqlashtirilib borildi. O'zbekistonda ijtimoiy yo'naltirilgan erkin bozor iqtisodiyotiga o'tish modeli Islom Karimov tomonidan ishlab chiqildi. Besh tamoyilni o'z ichiga olgan bu modelning mazmuni va mohiyati Prezidentning 1993 - yilda nashr etilgan "O'zbekiston – bozor munosabatlariga o'tishning o'ziga xos yo'li" nomli asarida asoslab berildi. Bu yo'l xalqimiz tomonidan ham, xalqaro maydonda ham taraqqiyotning "o'zbek modeli" deb qabul qilindi.

*O'zbekiston Respublikasi 1991-yil 31-avgustda mustaqillika erishgan bo'lsa 1-sentyabni bayram sifatida e'lon qildi. O'zbekiston mustaqillikdan keyin juda katta ozgarishlar amalga oshirildi mustaqillikdan keyin o'zbekiston ketma ket o'z ramzlarini qabul qila boshladi. Hozirda O'zbekiston degan davlat deyilsa juda koplak yirik davlatlar biladi va aloqalar qilishni rejalashtirib yuribdi. Ayniqsa hozirgi prezidentimiz Shavkat Mirziyoyev Miromonovich ning yurtimiz uchun qilayotgan hizmatlari ham ancha katta vatanimiz kundan kunga rivojlanib har sohada sportda talimda va boshqa har jabhalarda yirik kuchli davlatlar bilan ham raqobatlasha oladigan darajaga chiqyapti. Qisqa davr ichida O'zbekiston xalqi mamlakatimizning jahon hamjamiyatida munosib o'rin egallashiga asos boluvchi ulkan yutuqlarni qo'lga kiritdi. Bu ikki inson o'zbekiston uchun juda katta ishlar qilgan va qilyapti deya olamiz. Chunki birinchi prezidentimizning bizga vatanimizga qilgan ishlarini kitob qilib yozsak ham tugamaydi u insonni biz bekorga o'zbekiston qahramoni demaymiz. Hozirgi prezidentimiz ham shunaqangi zor ishlar qilyaptiki bu ishlarni korgan biz yoshlar kelajakka boshqacha ko'z bilan qarayapmiz. Bu ikki siymo bizga vattani sevishni va ardoqlashni orgatdi bu insonlar bizga o'rnak bola oladigan darajada zo'r insonlar.*

*Vatan yagonadur vatan bittadur.*

### FOYDALANILGAN ADABIYOTLAR:

1. @O'ZBEKISTONNING ENG YANGI TARIXI kitob pdf
2. Islom Karimov
3. JADID MA'RIFATPARVARCHLIK NAMOYONDALARINING IJTIMOY-SIYOSIY, FALASAFIY QARASHLARI. World scientific research journal, 15(1), 234-238.
4. TURKISTONDAGI JADID YANGI USUL MAKTABLARINING AHAMIYATI. Interpretation and researches, (4 (26)).
5. JADID ZIYOLILARINING MILLIY MA'NAVIY ATIMIZDAGI AHAMIYATI. ОБРАЗОВАНИЕ НАУКА И ИННОВАЦИОННЫЕ ИДЕИ В МИРЕ, 20(7), 35-38.